

LPR su plan di partido ta enfoca riba preservacion di tradicion- y balornan Cristian-Catolico

Despues di bandona partido AVP, parlamentario independiente Rycond Santos do Nascimento a establece su propio partido Lucha pa Reforma (LPR). Manera tur otro partido cu ta participando den eleccion dia 6 di december venidero LPR tambe a presenta su plan di partido pa periodo di gobernacion 2025-2029.

LPR su plan di partido ta consisti di ocho punto cardinal cu e partido Cristian-Catolico ta para tras di dje pa mehora e panorama politico di Aruba. LPR ta remarca den su plan di partido cu nan ta e partido cu ta ofrece un solucion cu ta duna un impulso na progreso, un solucion cu ta inverti den famianan y un solucion cu ta preserva e tradicion- y balornan di Aruba. E meta di e partido ta pa fomenta cambio significativo pa medio di innovacion y respet pa e herencia di e pais, sigurando un futuro prospero pa Aruba. LPR ta compromete na atende e problemanan urgente aki y construi un pais mas fuerte y mas inclusivo pa tur.

E enfoke di programa 2025-2029 ta LPR su compromiso pa construi un Aruba uni y prospero. E vision di e partido ta basa riba balornan Cristian-Catolico, un dedicacion na e bon comun, y un enfoke riba creacion di un futuro prospero, sigur y saludabel pa tur ciudadano. “Nos meta ta pa garantisa cu cada famia tin e oportunidad pa florece den un nacion cu ta balora integridad moral, responsabilidad social, y respet pa henter e



creacion di Dios,” LPR a remarca.

E prome punto di enfoke den e plan di partido di LPR ta responsabilidad fiscal. E partido ta resalta cu nan ta para pa un maneho responsabel di finanzas publico di pais Aruba. LPR ta enfatisa cu cada florin mester ser gasta conscientemente, sigurando cu e recursonan publico ta ser usa pa e beneficio di tur ciudadano.

Iniciativanan clave pa logra esaki ta inclui reforma fiscal, uso eficiente di rikesa di pueblo, reforma di e sistema di pensioen, y responsabilidad den forma di adkiri ser-

vicio- y productonan:

Otro punto di enfoke di e partido ta pa combati corrupcion y reestablece confiansa y integridad. LPR ta remarca cu corrupcion ta mina e moral di pueblo y ta horta rikesa di e pueblo. Nan ta sigura cu nan lo lucha cu determinacion contra corrupcion pa garantisa cu gobierno ta sirbi pueblo cu transparencia, honestidad y integridad.

Iniciativanan clave cu e partido lo implementa pa logra esaki ta boga pa liderasgo honesto, introduci proteccion pa e denunciante (Whistleblower) di e corrupcion,

transparencia y digitalisacion.

Siguiente punto den e plan di partido di LPR ta e necesidad pa empodera famia. E partido ta destaca cu famianan fuerte ta e fundeshi di un sociedad cu ta florece. Como partido ta compromete na apoya famianan creando oportunidadnan economico, promoviendo balansa entre trabou y bida personal, y alaves lo percura pa cada famia tin acceso na e recursonan cu nan mester pa por florece.

Iniciativanan clave pa logra e meta aki ta empoderamento economico, apoyo pa mayoran y cuido di Adulto Mayor.

Otro punto di enfoke pa partido LPR ta salud y bienestar di tur ciudadano. LPR ta remarca nan compromiso pa crea un ambiente sigur y saludabel unda cada Arubiano por prospera. Esaki ta inclui seguridad fisico y promocion di un estilo di bida cu ta honra e curpa como un regalo y tempel di Dios y ta enfatisa e importancia di deporte y salud mental.

Iniciativanan clave cu LPR lo implementa pa logra e meta aki ta bin cu programa pa un comunidad saludabel, fortalece seguridad den barionan y enfoca riba desaroyo infantil y hubenil.

Educacion y innovacion tambe ta forma parti di e puntonan di enfoke den e plan di partido di LPR. E partido ta enfatisa cu educacion ta e motor di oportunidad y den e siguiente periodo di gobernacion nan lo sigura cu tur mucha lo ricibi un educacion di calidad halto cu ta prepara nan pa un futuro exitoso, fundamenta den balornan y pensamiento critico.

Pa logra esaki LPR lo implementa iniciativanan clave cu inclui desaroyo profesional continuo pa docentenan, enfatisa riba programanan di STEM y educacion financiero, y introduci evaluacion continuo.

Manera varios otro partido, LPR tambe ta resalta e importancia di cuido di medio ambiente pa e futuro generacion. LPR ta destaca cu nan responsabilidad pa cuida e creacion di Dios ta guia nan compromiso pa un bon maneho ambiental. Nan ta sigura cu nan lo promove

crecemento sostenibel cu ta preserva e bunitesa natural di Aruba y ta sigura un planeta saludabel pa e futuro generacionnan.

Iniciativanan clave cu LPR lo implementa ta inclui energia renobabel, proteccion di medio ambiente y desaroyo responsabel.

Otro punto di enfoke den nan plan di partido ta desaroyo social. LPR ta remarca cu nan maneho social ta enfoca riba responsabilidad di cada persona, lasonan mas estrecho den comunidad y igualdad di oportunidadnan pa tur hende, reflehando nan compromiso Cristian Catolico pa stima y sirbi e prohimo.

Iniciativanan clave cu LPR lo introduci pa logra esaki ta inclui sigura vivienda pagabel y accesibel specialmente pa esnan di entrada limita, participacion civico y mehora e red di seguridad.

Ultimo punto di enfoke de e plan di partido di LPR ta resalta e necesidad pa un gobierno cu ta sirbi e pueblo di Aruba. LPR ta subraya cu compromiso pa crea un gobierno transparente, responsabel y cu di berdad ta sirbi e interes di pueblo. Nan ta enfatisa cu e gobierno cu nan lo apoya, lo ser guia pa e principianan di igualdad, rectitud y respet pa e dignidad di cada persona.

Pa logra e meta aki LPR lo implementa iniciativanan clave cu ta inclui empodera e ciudadano, responsabilidad publico y reduci burocracia.

“Nos ta campaña pa mas cu simplemente politica. Nos ta campaña pa hunto nos construi un miho futuro pa Aruba, basa riba nos fe Cristian-Catolico, basa riba amor pa nos famia y basa tambe riba un compromiso cu e bienestar comun. Hunto nos lo crea un Aruba uni, prospero y saludabel unda cada famia lo tin e oportunidad di prospera,” partido LPR a enfatisa.



Like us on Facebook



facebook.com/bondianoticia